

一 發心行相

菩薩發意求菩提，非是無因無有緣，於佛法僧生淨信，以是而生廣大心。

不求五欲及王位，富饒自樂大名稱，

但為永滅眾生苦，利益世間而發心。

常欲利樂諸眾生，莊嚴國土供養佛，受持正法修諸智，證菩提故而發心。

深心信解常清淨，恭敬尊重一切佛，於法及僧亦如是，至誠供養而發心。

深信於佛及佛法，亦信佛子所行道，及信無上大菩提，菩薩以是初發心。

二 略示勝能

信為道元功德母，長養一切諸善法，斷除疑網出愛流，開示涅槃無上道。

信無垢濁心清淨，滅除憍慢恭敬本，亦為法藏第一財，為清淨手受眾行。

信能惠施心無吝，信能歡喜入佛法，信能增長智功德，信能必到如來地。

信令諸根淨明利，信力堅固無能壞，信能永滅煩惱本，信能專向佛功德。

信於境界無所著，遠離諸難得無難，信能超出眾魔路，示現無上解脫道。

信為功德不壞種，信能生長菩提樹，信能增益最勝智，信能示現一切佛。

是故依行說次第，信樂最勝甚難得，譬如一切世間中，而有隨意妙寶珠。